



Selasa, 06 Agustus 2024

Ogen: Sakaria 6:9-15



Mahkota



Nats paksa tenengta enda nuratkan kerna Serubabel ndungi mbangun rumah pertoton. I bas ndahiken dahin si mbelin e, lit ka dahin sideban si arus idungi e me nikapken penanguken Josia anak Josadak. Kata Tuhan seh man Sakaria guna mpersingeti Josia anak Sepanya gelah muat persembahen si ibaba bangsa e i bas taneh pembuangan nari, janah arah kerina persembahen e ibahan sada mahkota i bas pirak ras emas nari. Mahkota si ibahan e itamakan ku takal Imam si Mbelin Josua anak Josadak. I bas namaken mahkota e atan pe Heldai, Tobia ras Jedaya. Gelar-gelar si telu enda jadi catatan guna iinget, sabap teluna ia ikut nampati lako ndahiken sura-sura Dibata. Teluna kalak enda ikut muat bagin lako ndungi tugas alu patuh man perintah Tuhan. Si enda njadikan kalak enda teluna jadi teladan man bangsa Jehuda si lit i Jerusalem. *"Kataken man bana kata Tuhan si Mada Kuasa bagenda, "Kalak si tergelar dahan, turah nge alu mehumur i bas inganna, janah iumbanna Rumah Pertoton man Tuhan. Ia me si majekken Rumah Pertoton Tuhan e, jenari ngaloken kehamaten bagi si ibereken man raja, janah iperentahna me rayat e. Sekalag imam tedis deherken kursi kinirajanna, janah duana ia erdahin alu dame ras sada perarih. Mahkota e ibahan jadi sada peringet-ingeten i bas Rumah Pertoton Tuhan guna enghamati Heldai, Tobia, Jedaya ras Josia"*. Tuhan banci saja make ise pe guna nehken sura-suraNa; Tuhan banci saja make kerina situasi gelah teridah Kuasa ras KemulianNa; Tuhan netapkan kerinana rikutken waktu ras bagi si ngena ateNa.

Mahkota guna itamakan ku takal Imam si Mbelin banci idungi dengen Rumah Pertoton ingan ersembah man Tuhan pe banci idungi alu penampat piga-piga kalak si patuh dengen malang man Tuhan. Kepatuhen man Tuhan erbahansa dahin si mbelin banci terdungi e me ndungi Rumah Pertoton ras erbahan mahkota.

Kita me gundari Heldai, Tobia, Jedaya ras Josia jaman enda si isuruh Tuhan lako nehken dengen ndahiken sura-suraNa. Banci saja melala si ngolangi guna nehken sura-sura Tuhan tapi adi kita patuh ras malang man Tuhan, si ngolangi e pe banci jadi pasu-pasu.